

摘藻堂四庫全書薈要

集部

欽定四庫全書薈要卷一萬九千九百八十九

集部

宋文鑑卷六十六

宋 呂祖謙 編

表

謝知制誥表

王安石

高華之選欲報常艱固陋之身以榮為懼竊以自古招
智能之士因使為侍從之臣豈特賴其虛名謂能華國
益將收其實用相與致君矧號令文章之為難而討論
潤色之所寄苟失職不稱則惟時起羞伏惟皇帝陛下

躬上聖之資撫久安之運趨時有救弊之急守器有持
盈之難當得俊良使陪遺忘則典司明命出入禁門一
有疎官尤為累上臣羈單賤士鄙朴常人仕初有志於
養親學遂不專於為已比更煩使稍竊謬恩內懷尸祿
之慙仰負食功之意又蒙採擢以至超踰蓋君之視臣
不使同犬馬之賤則下之報上亦欲致岡陵之崇況臣
少習藝文粗知名教遭逢一旦度越衆人唯當盡節於
明時豈敢止懷於私計

江寧府謝上表

王安石

稽違詔令經涉歲時先帝登遐既不獲奔馳道路陛下
即位又未嘗瞻望闕廷所憂後至之刑誅敢冀就加於
官使雖知黽勉尚懼顛隳蓋聞因任以責羣材原省以
通衆志厥或抱能而可用則雖負疾而見容如臣者逮
侍先朝叨官外制惓惓許國雖有愚忠役役隨人但尸
榮祿銜哀去位嬰疾彌年望絕龍光分投冗散伏遇皇
帝陛下紹膺尊極俯燭幽微延之以三節之嚴付之以

十城之重比緣裡祀特有褒封申命曲加因郵併賜唯
是土風之美素無犴獄之煩久寄託於丘墳粗諳知其
閭里念雖閉閭殆弗廢於承流以比造朝或未妨於養
疾矧恩勤之已迫且遜避之不容敢不少嘗體力之所
任祇奉詔條而為治冀逃大戾仰稱殊私

謝翰林學士表

王安石

臣聞人臣之事主患在不知學術而居寵有冒昧之心
人主之畜臣患在不察名實而聽言無惻怛之意此有

天下國家者所以難於任使而有道德者亦所以難於
進取也學士職清地要而以討論諷議為官非夫遠足
以知先王近足以見當世忠厚篤實廉恥之操足以咨
諏而不疑草創潤色文章之才足以付託而無負則在
此位為無以稱如臣不肖涉道未優初無聲聲過人之
才徒有區區自守之善以至將順建明之大體則或疎
濶淺陋而不知加以憂傷疾病久棄里閭辭命之習蕪
廢積年黽勉一州已為忝冒禁林之選豈所堪任伏惟

皇帝陛下躬聖德承聖緒於羣臣賢否已知考慎而於其言也又能虛已以聽之故聰明睿智神武之實已見於行事日月未久而天下翹首企踵以望唐虞成周之太平臣於此時實被收召所以許國義當如何敢不磨礪淬濯已衰之心紬繹溫尋久廢之學上以備顧問之所及下以供職司之所守

謝賜對衣鞍馬表

王安石

出大庭之顯服束以精鏐引內廐之名駒傳之錯采隆

恩所逮朽質知榮竊念臣弱力淺聞久憂積疾中預從
官之選外分守將之權僅免譴訶更蒙收召論思潤色
曾莫效於微勞衣被服乘乃前叨於異數此蓋伏遇皇
帝陛下醲於慶賞詳在招延因示眷懷使知奮勵誓竭
愚忠之報冀無虛授之嫌

謝賜弟安國及第表

王安石

雋乂之求外覃草野龍光之施首逮門庭竊以躬國論
聽斷之煩而察知孤遠之行略門資貢舉之法而拔取

滯淹之才山林之所誦說而難遭閭巷之所驚嗟而罕
見伏惟皇帝陛下協德穹昊比明義和博臨四方洞照
萬物如臣同產為世畸人少遭閔凶自奮寒苦雖強學力
行粗有時名而少偶寡徒幾絕榮望豈期聖聽俯及幽
潛遂使窮途坐陞華寵獎以詔書而試藝賜之科第而
命官祿不逮親既永乖於養志仕非為己當共誓於捐
軀

進修南郊式表

王安石

郊丘事重筆削才難猥以微能叨承遴選蓋聞孝以配
天為大聖以享帝為能越我百年之休明因時五代之
流弊前期戒具人輒為之騷然臨祭視成事或幾乎率
爾蓋已行之品式曾莫紀於官司故國家講燎禋之上
儀而臣等承撰次之明詔迨茲彌歲僅乃終篇猶因用
於故常特刪除其紛冗恭惟皇帝陛下體聖神之質志
文武之功嘉與俊髦靈承穹昊物方鬯茂以薦信而無
慙人具昭明知因陋之為恥固將制禮作樂以復周唐

之舊豈終循誦習傳而守秦漢之餘則斯書也譬大輅之椎輪與明堂之營室推本知變實有考於將來隨時施宜亦不為乎無補

謝男雱除中允說書崇政殿表 王安石

恩驟加於私室多所超踰事或累於公朝誠難冒昧仰煩睿訓曲喻至懷永惟眷獎之殊實重兢慙之至伏念臣首叨召節得侍詞林隨被贊書使陪經幄稍更歲月莫補涓埃竊觀上智之日躋內訟淺聞而知困况如賤

息厥有童心尚迷鑽仰之方豈稱招延之禮恕已量主
非敢以私而自嫌為官擇人顧雖成命而宜改輒布可
辭之義上干難犯之威伏惟皇帝陛下屈體優容垂精
寵答謂大人照臨之道廣當養以蒙意小夫誦說之智
專遽忘其賤褒稱備厚訓飭加嚴揣實未安寄顏有慙
重念自古君臣之相與未有如臣父子之所遭蓋當用
儒之時尤難講藝之職典謨方御實參備於討論誥誓
未終已繼叨於獎擢獲世官於閭巷嗣家學於朝廷自

非忘軀何以報國知人而官以哲慨已獲於明揚委質而教之忠誓永肩於素守

乞皇帝御正殿復常膳表

王安石

陽春生物偶霑澤之稍愆睿意恤民遽側身而自抑德已修於消變數或係於非常當服彝儀用安羣下恭惟皇帝陛下天仁博施神知曲成躬忘盱食之勞坐講日新之政四時協序萬物致和適當化養之辰宜得涵濡之澤少違常候深軫清衷退師氏之正朝約大官之盛

饌仰窺謙德志在閔民然而異域來朝當即法宮之位
誕辰入慶合陳燕俎之珍事有所先禮難偏廢伏願仰
回淵聽俯徇輿情夙御九筵之居並羞十閤之具上以
全於國體下以副於臣誠

第二表

王安石

時澤偶愆屢勤齋禱聖衷愈勵曲盡焦勞將損已以召
休因退次而貶食列陳剡奏尚闕嗣音在臣列之靡遑
伏帝閭而再扣恭惟皇帝陛下體居離正德稟乾剛期

揉俗以致康嘗納隍而興念七載于此繼獲豐穰一春
而來或罹愆亢皇慈深軫羣祀徧修恐狴犴則親慮
其囚懼黼黻美則躬變其服仍損內饗之舉兼虛正寧
之朝然而禮貴從宜事難泥古而況甫臨誕節交舉慶
儀有列辟拜萬年之觴有殊俗修兩朝之好苟虧彝制
難副羣情伏望少屈淵衷特從誠懇天臨廣廈日御常
珍親事法宮廓宣於政治惟辟玉食昭示於等威仰以
慰兩宮之慈俯以安羣下之望

謝東府賜御筵表

王安石

恩厚不貲誠優賢之務稱頑冥無似欲報國而知難臣
等過以凡材並膺殊選久壅賢路上孤聖時伏惟陛下
謀德在容求仁以恕謂大臣方宣勞於王室則人主當
加恤其私家發使禁闈之中視圖魏闕之下取才置臬
皆斷於睿謀成事告功不煩於宰旅重紆衡蓋周視庭
除申以中人諭之良月使及日辰之吉即于堂寢之安
輟車府之傍牽載其帑重移饗官之烹割侑以鼓歌歡

更逮於邇臣寵先加於小已陰陽或謬未知變理之方
風雨其除徒賴帡幪之賜

乞罷政事表

王安石

私懷懇至已具布聞聖訓丁寧未蒙開納敢冒崇高之
聽再輸悃悞之情臣聞任賢之方要其有用陳力之義
止於不能苟弗集於事功且重罹於疾疾豈容叨據以
累明揚伏念臣猥以孤生親逢盛世昧於量已志欲補
於休明失在信書事浸成於迂濶每煩衆論上恩聖聰

久知素願之難諧繼以積疴而自困辭而去位庶逃竊
食之誅勉以就功重荷包荒之德雖貪順命終懼妨功
伏惟皇帝陛下閔度并容大明俯燭特垂矜允俾遂退
藏如此則孤進之身獲全生於末路具瞻之地得改命
於時材

乞退表

王安石

臣忠於為國故進而能致其身君恕以及人故病則閔勞
以事此今昔共由之通義實上下相與之至情敢觸冒

昧之誅冀蒙哀矜之聽臣受才鄙劣遭運休明陳愚或
會於聖心承乏遂尸於宰事謀謨淺拙謾不見其有成
操行陵夷又或幾於無恥久宜辭位尚苟貪恩豈圖養
拙以乖方重以瞽昏而廢務粗嘗陳列未獲矜從黽勉
以來浸淫遂劇大懼典司之曠上煩程督之嚴伏惟陛
下詢事考言循名責實或輟夜分之寐嘗臨日昃之朝
萬方黎獻之多各皆祗辟三事大夫之守豈可濫官仰
冀高明俯昭惻愍念其服勞之久愍其撻瘵之深及未

千鈇鉞之時令遂解機衡之任豈特少安於私義茲惟
畢協於師虞

第二表

王安石

聖恩所及有隆天重地之施私義未安有深淵薄冰之
懼竊惟成湯高宗之世有若伊尹傳說之臣其道則格
于帝而無疑其政則加乎民而有徧后惟時又相亦有
終迨乎中世之陵夷非復古人之髣髴忠或不足以取
信而事事至於自明義或不足以勝姦而人人與之為

敵以此乘權而久處孰能持祿以少安此臣之慮危於
居寵之時而昧死有均勞之乞況於抱病浸以瘵官伏
惟陛下道與日躋德侔乾覆哀一夫之失所樂萬物之
皆昌矧夫眷遇之優既已勤劬之久宜蒙善貸使獲曲
全賜其疵賤之身假以安閒之地則敝車無用猶可具
於勞薪棄席未忘或再施於華幄

賀周德妃及魏國大長公主禮成表

王安石

明告治庭寵頒恩冊家邦之慶海宇以欣恭惟皇帝陛下荷天闕休若古丕式自禰率而尊祖備極靈承謂姊親而先姑特加徽數改錫厥壤增褒所生大號已孚庶言惟允臣久尸榮祿竊睹盛儀臚傳雖異於九賓率舞尚同於百獸

賀冬表

王安石

陰偕物極陽與朋來推歷玩占乃見潛萌之信體元御辨以知敦復之中恭惟皇帝陛下舜孝禹功文謨武烈

茂對時之福嘏靈承旅以壽康臣久冒朝榮外叨方任
弗預稱觴之末豈勝存闕之深

乞宮觀表

王安石

筋骸衰邁僅有餘生肝膈精微簡在聖聽豈圖寵獎未
賜矜從輒冒威尊更輸情素伏念臣久妨機要初乏涓
埃苟免庶尤實荷恩私之至敢緣多疾更尸名器之崇
比辱使軺俯宣詔旨深惟策勵仰稱龍光而況病瘵有
加療治無損辭榮家食乃為理分之宜干澤自營尚恃

眷憐之舊伏惟皇帝陛下衡聽萬事器使衆材念其黽
勉之終難假以便安而少愒庶完體力圖報毫分

賀赦表

王安石

精意上昭神靈底豫茂恩旁暢夷夏接和臣聞道以饗
帝為難禮以配天為至有秩斯祜唯四表之歡心胡臭
亶時匪九州之美味自古在昔若聖與仁厥遭昌辰乃
觀熙事恭惟皇帝陛下邁種三德敷奏九功率籲奉璋
之衆髦隆稱奠璧之新禮廟邊致孝郊血告幽誠既格

於穹旻福遂均於品庶振憂矜寡原宥責裁第五玉以
褒封善人是富發三錢而慶賜賤者不虛天其居歆人
以呼舞臣夙叨寵獎親值休成雖無預於駿奔實不勝
於竊抃

賀正表

王安石

寶厯無疆嘉生有俶門憲始和之象庭充元會之儀伏
惟皇帝陛下膺保永圖茂綏純嘏撫五辰而致順毓萬
物以皆昌臣久負異恩尚櫻衰疾瞻雲煥爛欣逢舜旦

之華擊壤逍遙樂得夏時之正

謝朱炎傳聖旨令視事表

王安石

使指遄臻訓詞俯逮敢圖衰疾尚悞眷存伏念臣曲荷
搜揚久孤付屬有能必獻未嘗擇事而辭難無力可陳
乃始籲天而求佚然方焦思有為之日以此懷恩未報
之身苟營燕安豈免慙悸伏蒙陛下人惟求舊義不忘
遐乃因乘輅將命之臣更諭推轂授方之意跼履無用
誠弗忍於棄捐朽株匪材尚奚勝於器使永惟獎勵徒

誓靡捐

謝加南郊恩表

王安石

解澤旁流明綸俯被永惟叨昧深以兢榮竊以時郊丘之承所以尊上帝疇官邑之賜所以富善人盛福靡專至恩惟稱臣久塵要近上累昭明方玉輅之親祠以銅符而外守逮均休慶例獲褒嘉此蓋伏遇皇帝陛下以平施於萬方無遐遺之一物矧蒙圖任之舊特荷獎知之深祇服訓辭敢忘報禮

賀景靈宮奉安列聖御容表

王安石

新一代之上儀極二端之美報經始有倣實自睿謀歡
成無疆乃惟衆志竊以閔宮鬼享周特腆於姜嫄原廟
神游漢獨隆於高帝遠或遺祖近止及親恭惟皇帝陛
下服卑而即功食菲以致孝嚴祖宗之衆像依仙釋而
異宮館御因時初豈忘於苟簡修除備物乃有待於純
熙宸宇秘嚴扁榜崇麗裸獻式序安侑維時藐然往初
孰此倫擬臣久尸榮祿尚負宿疴聞釐事之既成與羣

情而偕樂

賀南郊禮畢表

王安石

精明條達神睠顧而依懷膏澤川流人歡呼而蹈厲臣
聞語孝之至莫大於配天議禮而輕不足以享帝能舉
釐事實歸聖時恭惟皇帝陛下鴻化已昭康年屢應奔
走籩豆有釐正之治官潔豐粢盛有底慎之財賦禮成
穀旦恩浹縣區雖洛誦之休明尚難譬稱豈兒寬之淺
訥能盡揄揚臣夙荷慈憐方纓袞瘳望九賓之紳笏獨

遠句傳狎百獸於山林猶知率舞

辭南郊陪位表

王安石

萬國駿奔煒上儀之殊觀一夫幽屏叨明命之特招伏
念臣竊祿已多冒恩最渥自致惓惓之義實有素情再
瞻穆穆之容豈非榮願而繭然暮景櫻以沉痾伏畎畝
以負薪於今未已侍壇垓而踐豆用此為妨

謝免南郊陪位表

王安石

螻蟻惓惓上千旒宸雲天顙顙俯賁丘園臣憊矣微生

頽然暮齒冒恩鼎食非堅卧以為高承命旌招宜駿奔
而反後顧緣衰繭致隅清光伏蒙陛下特赦尤違曲垂
念聽鄙昏難望尚延舜日之華荒翳易遺更獲堯雲之
潤

辭明堂陪位表

王安石

合宮丕享寰宇駿奔冒被優詔之加使陪顯相之末伏
念臣投身荒遠上負眷憐企踵禁嚴久勞鑒寐况宗祈
之盛禮辱號召之明恩當即辦嚴豈容辭疾而沉冥浸

劇黽勉實難心若子牟雖每存於魏闕身如楊僕乃自
外於漢關

謝加食邑表

王安石

顯相郊宮固宜寵獎曠居田里乃濫褒加伏念臣尚負
宿疴久尸榮祿無可論之薄效有未報之隆恩方國明
裡庶工祇載奉璋執豆旅幣獻琛具輪奔走之勞獨抱
滯留之歎豈圖踈逖亦冒寵光此益皇帝陛下荷休駿
厯歛福敷錫故雖幽屏弗以遐遺身每被於慈憐心敢

忘於勤策

廣德軍謝上表

錢公輔

曠官罪大奪位秩者彌年享帝恩隆回雷霆於數日籍
還省部身忝軍牙祇荷寵靈伏深感懼伏念臣江湖賤
士岩穴孤生出逢聖辰升備法從學非深造粗能明致
治之方心不苟容姑欲罄事君之節義當有在雖富貴
誘之而不回職所宜言雖斧鉞威之而益厲果由官守
遂正典刑放之窮山所以苦其心志授之散秩將以餓

其體膚期沒齒於蒿萊敢希榮於軒冕豈圖寬宥尚被
采收死灰誰謂乎復然白骨安知乎再肉便鄉守壘上
冢還家百計安閒一身安逸使其自請未必能然此蓋
伏遇陛下化極文明恩漸動植如天之覆遠則彌周如
日之中幽無不燭遂容駑質猥玷鴻私況是桐川獨居
江左俗雖僻陋而稱風物之良地雖褊迫而有山林之
勝養茲不肖孰曰匪宜惟修省所以飭躬惟忠勤所以
報國有民有社固恪奉於訓詞為子為臣方益堅於素

節哲彥殫犬馬仰答龍光

宋文鑑卷六十六

欽定四庫全書薈要卷一萬九千九百九十

集部

宋文鑑卷六十七

宋 呂祖謙 編

表

謝南郊加恩表

王 珪

奉二精之報方錯事於崇丘獵三靈之流遂均釐於邇
輔仰承嘉命俯惕孤衷伏念臣蚤會昌期進聞國論器
雖狹於所用志常勇於有為屬修郊廟之祠叨與公卿
之議鳴鐘在簾獲際靈旂之娛紆佩掃塗親承天步之

恪曾乏秉文之助得觀繼聖之能逮敷錫於鴻休復過
膺於寵數論非朝允恩實天隆茲蓋伏遇皇帝陛下文
輯濶希仁漸疏逖因神推惠既被虫魚之豐為已掠功
何勝淵谷之畏尚勉殫於樸守期少謝於曲成

請皇帝罷謁太廟表

王珪

近嘗拜章以大慶殿將行恭謝天地之禮乞罷前一日
謁太廟者伏以升燎于壇即節徂郊之禮奉璋于室宜
財假廟之文俞音未回羣聽猶鬱恭惟尊號皇帝陛下

膺純耀之烈撫休明之期蓋神勞萬務則氣或盪和以
德交三靈則福亦旋感念保綏於鴻業思昭謝于高穹
廼涓路寢之居以象圓丘之饗潔盛芳潔璧玉華光方
將陟配三后之靈導迎上帝之貺茲誠為人子者孝之
盡有天下者報之隆今復馳齊蹕之嚴祇太室之薦切
恐霧露之氣涉于宵衣輿馬之音震序天步則非所以
承祖宗之受來邦家之休臣等冒秉化鈞獲司熙典謂
文之所損在于適時之變且事不敢勉誠以愛君之深

與不並侑之虔願弭先期之謁儻乎衆欲是契天心

謝賜生日禮物生餽表

王珪

詔函俯暨臺饋申頒絕衡弼之異恩動里閭之殊觀伏
念臣所懷蹇淺自奮羈單方少而孤每感劬勞之日其
生也幸得遭熙盛之朝遂以區區投老之身而處赫赫
具瞻之地與圖邦政固無經遠之謀式燕私門更誤養
賢之禮此蓋伏遇皇帝陛下寵綏近辟丕冒庶工謂君
臣同體則憂樂宜均而上下相求則報施為重幣增實

匪寵已厚於解衣餼稟盈庭愧有加於浮食敢不內竭
朴愚之守上酬獎顧之深

謝賜生日禮物表

王珪

聖言如綍有溫厚於芝函邦錫自天發光華於蔀室榮
踰素望媿溢常涯伏念臣以固陋之資被睿神之眷廼
預塵於政路復冠列於台司歲月崢嶸而屢更精力勤
勞而莫補速譏讒於衆口愧功烈於前人逮茲苟完安
有橫冀載及桑蓬之序方深崱屺之思念莫報於劬勞

敢餐承於恩禮良金燭乘嚴寶勒於天駒藻帛絢文雜
華章於笥服豈繫蕃庶併及衰遲此蓋伏遇皇帝陛下
敦舜孝以儀民軫堯仁而冒物特厚柄臣之遇過盼御
府之珍交孚曲記於賤生博愛乃容於濫賜拜漢庭之
寵雖慙稽古之工報周雅之章願上如岡之壽

越州謝上表

沈文通

以親為請得郡甚優越去宮庭介居江海就職之始撫
心弗寧伏念臣本諸生知守前緒親逢文治之盛冒塵

科選之榮擢躋儒林遂執史筆學不足以達治亂於顧
問實難文不能以通古今於述作何有誤出聖朝之遇
進登侍從之塗黽勉備官逡巡待罪雖大恩未報豈敢
便安其身顧私養弗充不勝進退之迫輒以誠乞既茲
奠居幸溢於涯感無以喻此蓋伏遇尊號皇帝陛下天
地之德覆載而無所不容日月之明照臨而無所不暨
故臣得遂其犬馬之志安于藩翰之間况茲為州自昔
建國連帶數郡之廣總齊萬兵之權有可以為當無所

苟尚寬東顧之慮少獲萬分之心

越州謝上表

元絳

易帥嶠南方深危懼分符浙右特荷保全仰服恩章惟
知感涕伏念臣習知忠誼竊慕功名歷事三朝行將四
紀向自北垂之漕就更南粵之麾蒙臨遣以丁寧敢遑
安而留滯載驅長陸甫及半途忽聞羽檄之音謂有龍
編之警橫水明光之甲得自虛聲雲中赤白之囊倡為
危事邊萌擾動朝聽震驚況在乎守臣敢愆奔命夙馳

南海已久見於吏民日遠長安蓋未聞於章奏仰煩宵
旰咨及臣鄰謂護塞之急人且擇才而代戍驅車萬里
虛出玉關之門乘駟一麾幸至會稽之邸尚兼方面彌
畏人言此蓋伏遇陛下法道曲全等天丕冒以臣更事
縣久備歷四方之勤知臣立朝最孤迺無一介之助渙
然休命付畀藩臣敢不訓旅以嚴安民以靜庶希樂
易之治仰補熙隆之時銜賜不貲論生曷補

謝致仕表

元絳

四載披誠斬還於朝組九重垂聽申錫於詔函預儲宮
之備官遂家林之佚老伏念臣衣纓衰緒樗櫟下材再
亂而孤僅能構思未冠而仕始務代耕惜儒術之逢原
狃吏文之宿業歷官三世服勞四方蒙上聖之誤知自
東州而即召擢真詞禁進處冬官浸膺選衆之求竊貳
贊元之任近藩出守遇潛邸之建旄別殿追還復露門
之奉席遽周歲律屢對威顏自惟癯朽之餘每循止足
之戒深辭圭紱冀就田廬載齒孤鳴空懷疲戀槁骸如

在正欲全歸仰煩睿訓之慈終竊愚衷之守不圖寵眷
加進榮階存東宮保養之官仍西清嚴近之職效華封
之祝子佇見多男階商皓之通賓願護太子恩隆山岳
感浹肺肝此蓋伏遇皇帝陛下大道曲全至仁博施念
師丹之垂老久已宣勤察衛綰之無他居常遠恥越推
渥渙獲保初終託里俗而有輝顧師言而至愧冥鴻雖
遠正依天寓之函容時藿未彫尚素日華之明潤逢辰
知幸之死不忘

定州謝上表

呂公著

尸榮右府無俾廟筭之奇假守中山復當閫制之重戴
恩為懼虔命以行遙屆郡封恪宣條詔伏念臣降才謏
薄植性懦愚學術不足以稽五謀之疑識慮不足以籌
千里之勝特以百年舊族荷累聖不貲之恩一介微軀
辱上主非常之遇寅緣寵渥更踐清華晚收踈外之孤
蹤擢贊微幾之要務奉天光而咫尺被聖誨之丁寧謂
臣世服近僚有均休共戚之義察臣傍無厚援絕背公

死黨之嫌曲示優容俾思報效顧駑駘之難強嗟蒲柳
之易衰久預枋司積有妨賢之畏游祈麾寄更圖陳力
之方伏遇皇帝陛下體虛靜以儲神極高明而盡下俯
矜素悃特霽俞音惟定武之奧區據朔陞之重地尚叨
付委靡即棄捐仍進叙於文階且兼華於秘殿併將厚
意增賁舊臣況臣夙侍軒墀實司樞筦凡治軍經武之
要洎守塞禦戎之宜日炙睿謀備觀宸斷逮茲臨遣得
以遵承謹當細大必躬夙宵彌勵進不敢希功而生事

退不敢弛備以曠官期不玷於誤知庶少酬於鴻施

河陽謝上表

馮京

久塵右地無補聖明坐竊邇藩尚寬罪戾恩私溢望愧
灼兼懷伏念臣才不逮中智非經遠特逢盛際再列近
司擢之於尋常之中振之於顛危之下便蕃異數究極
寵光齟齬備員僅能寡過碌碌成事無足論功徒肩許
國之誠靡講衛生之術曩嬰疾疹殆至膏肓雖賴上醫
迄存餘喘然而氣血潛耗智慮早衰筋力乏於步趨耳

目華於聽覽勉從職事仍歷歲時覆餗之譏已騰衆口
乞麾之請遽惻上心矧惟右輔名都三城重鎮水陸皆
便次舍非遙食物具宜堂皇尤峻使傳罕經於館候訟
牒希至於庭除加以時雨既優宿麥滋茂盜賊屏息閭
里阜安不煩施為有便頤養此益伏遇皇帝陛下天地
容覆日月照臨私臣以不報之恩諒臣有可矜之理終
始眷遇進退保全顧何心顏敢愛軀命惟願稍加藥餌
益近方書朝露未晞儻復還於舊觀爝火不息誓更竭

於精神

賀熙寧十年南郊禮畢大赦表

曾鞏

人之所歸者莫如德天之所享者在於誠其惟聖王克
有全美伏惟皇帝陛下聰明稽古承繼祖宗慈惠愛人
撫臨邦國有徧覆并容之大度有防微慎獨之小心不
從遊畋不近聲色無紛華盛麗之好無便僻側媚之私
歲時吉蠲以承七廟左右順適以奉兩宮其功施於人
效見於事則宅仁由義縉紳之徒成材於學校超距跼

鞠熊羆之旅養勇於營屯甌窶汚邪之收充於倉廩關
石和鈞之利阜於市廛家有豫樂之聲人無愁怨之色
協氣所召休應自殊鈞陳太微星緯咸若崑崙渤澥波
濤不驚近則金石之音鳥獸欣躍遠則干羽之舞蠻夷
駿奔象齒旅於闕庭龍媒納於閑廐是謂六府三事皆
可以歌四海九州罔不率俾蓋巍巍而特起非瑣瑣之
能闕前世議太山之封謀梁甫之禪者度崇比大疇克
登茲陛下抑而不圖謙以自牧以謂先后創業垂統其

功莫得而名上帝隕祉發祥其德無可以稱思所以報
一本於心故寅畏嚴恭積之有素而齊明薰祓進而益
虔在於物者不取其煩盡諸已者必求其實是以蕭光
之烈奏於宗祊柴燎之蒸焜於郊兆幽隱昭答神靈顧
懷無疆惟休方寔昌於萬世不敢專享故敷錫於羣元
稽參典彙定著赦令弛張從理同異稱情蠲罪肯而棄
瑕疵錄勞能而縱逋負顯晦咸暨洪纖不遺萬國之歡
既交於沖漠一人之慶遂及於跂蠕孚于上下之間極

乎帝王之盛臣被學最舊蒙恩寔深莫侍甘泉之祠獨
嘆周南之滯第從臣之嘉頌未效薄材望屬車之清塵
但馳遠思

謝元豐元年歷日表

曾鞏

一遠闕庭十移星歷顧彫零於齒髮無補報於毫分伏
惟皇帝陛下敘大禹之九疇齊有虞之七政陰陽寒暑
罔不若時草木昆蟲舉皆遂性循用頒正之典寵詒分
土之官臣幸備守藩預聞告朔去親方遠已驚歲月之

新許國雖堅更嘆功名之晚惟體在民之意庶裨及物之仁

謝翰林侍讀學士表

范鎮

省中四禁忌誤其一苟或有犯加罪不原猥蒙貸全猶藉親近內自循省以榮為憂竊以賞而受賞者若固有之善賞也罰而被罰者知自取之善罰也成王舉魯七百里之地以封周公周公拜於前魯公拜於後而不以為泰者功所當也管仲奪伯氏駢邑三百沒齒無怨言

者罪所宜也伏惟皇帝陛下錄社稷之功而賞加輔臣
重書詔之失而罰及學士賞所當賞罰所當罰明命一
出中外聳然因使天下之人曉然知先帝與子之明而
羣臣得君之慶臣於此時死固無憾况蒙再造使之更
生者乎重念臣出乎遠方孤陋朴拙臣子忠義則嘗講
聞朝廷典章實匪練習果緣所短有玷斯猷不加蕭斧
之誅乃換金華之職雖云薄責足警羣倫且天地大恩
固無論報之理而冰霜素節猶有持守之常願堅初心

以收來効

謝致仕表

范鎮

早衰多病得謝歸休有命自天所容如地仰銜恩紀伏
竊兢榮伏念臣本出孤生歷塵撫仕曾無報効虛積歲
時仕宦之年已更一世遭逢之幸實事三朝徒有愚忠
以自信處雖曰乞身而去敢忘憂國之心因敘人言上
干天聽曲蒙寬貸未賜誅夷得於盛明之時以遂閒適
之性伏惟皇帝陛下審持賞罰而一諉於公總秉權綱

而不放於下集羣議為耳目以除壅蔽之姦任老成為
腹心以養和平之福躋民富壽措國康寧臣之至情實
在於此

謝龍圖閣直學士表

宋敏求

推宸扆之誤恩備禁塗之常從聞命榮抃省躬兢惶伏
念臣性理憊冥局致庸近猥緣承學之舊宴沐右文之
風英宗皇帝拔自書林真於詞掖雖汲黯蚤進謬旅於
雋游而蕭育稀遷自安於拙分一叨獎拔星紀僅周固

嘗勵翼其心靖共所守顧命義以弗苟務忱恂而匪他
以至陟諫臣之坡司史氏之筆還儒館而塵麗正之職
分使節而贊甘泉之儀益忻聖旦之親逢莫匪臺家之
茂選而曲綏皇眷冒進榮階謂臣嘗事先朝典右曹之
緡紼俾臣特陞延閣直西序之圖書撫棄迹以重收帖
寵名而差敘帶環申錫詔檢垂褒此蓋伏遇皇帝陛下
權綱大新恩斷中出均天地之平施煦及陳茲回日月
之餘光豐於部室致茲簞器亦預清班敢不慎服官箴

勤殫忠蘊庶圖來効少報洪私

安州謝上表

滕甫

屢致人言固宜竄殛曲蒙天造尚賜保全雖易守符仍
叨善地土民純秀幾同廣魯之流風里俗驩康正值元
豐之樂歲安閒事簡尸素為慙伏念臣本以愚儒出逢
真聖首蒙國士之遇最在衆人之先便欲碎首以酬恩
未知死所故嘗指心而自誓惟有天知况事任既已徧
更在人情寧不愛惜豈有固為緩縱自取顛隳惟日月

之至明亮肺肝而必照於憐舊物收置近藩而朝廷難
廢於公言故君父特存於大體稍從遠外終不棄捐顧
臣何人受恩若此此蓋伏遇皇帝陛下神聖徧物清明
在躬化覃無外之封疆仁及何知之草木況臣累更器
使粗效愚衷眷此遺簪嘗辱提攜之末譬之行葦更收
踐履之餘臣敢不祇奉簡書服勤吏役雖桑榆之景景
將逼暮年而犬馬之微誠猶思後效

謝澶州簽判表

程顥

論議無補職業不修國有典刑罪在誅戮曲蒙宏貸仰
荷洪私期於糜捐莫可報謝臣性質朴魯學術空虛志
意粗修智識無取陛下講圖大政博謀羣材過聽侍臣
之言猥加風憲之任臣既遭遇明聖亦思誓竭疲駑惟
知直道以事君豈忍曲學而阿世屢進濶疎之論愧非
擊搏之才徒嘗剗瀝肺肝曾無裨補毫髮既不能繩愆
糾繆固不願沽直買名豈敢冒寵以居惟是奉身而退
自劾之章繼上闔門之請采堅天意未回憲章尚屈更

奉發中之詔俾分提憲之權不惟沮諍論之風亦懼廢
賞刑之實力形奏述恭俟誅夷此蓋伏遇皇帝陛下極
天清明普日臨照洞正邪之心迹辨真偽於幽微察臣
忠誠恕臣狂直不忍寘諸重辟投之遠荒解其察視之
官處以便安之地生成之賜義固等於乾坤涵容之恩
重益逾於山嶽臣敢不日新素學力蹈所知秉心不回
信道愈篤願徇小夫之志不為儒者之羞或能自進於
尋常庶可仰酬於萬一

代謝進和御詩獎諭表

強至

參羣篇而奏御賡載非工被優詔之發中褒嘉甚渥惕
然拜君父之賜藏以為子孫之榮伏以書曰帝庸作歌
所以極道明良之意雅云臣能歸美所以上酬福祿之
辭惟千載一時之逢踰三王二帝之際乘太平之多暇
講稀濶之盛游歷寶宇以披祖宗相受之文御飛帚以
縱神聖有餘之學以至置酒別殿賦詩中宸于時從聯
咸續睿唱如臣者有朴愚而植性無文采以表身自陪

風憲之要司都廢雅言之舊學妄挾鄙思綴成斐章大
樂在前發哇聲而接響太陽臨下銜燭火以交光既黷
遽旒若臨深谷敢謂兼容之度例形過獎之辭游聖門
者謂之難言矧繼堯文之後踰華袞者重夫褒字矧蒙
漢訓之加夫何孤臣叨此厚幸此蓋伏遇尊號皇帝陛
下齊德乾覆育材士倫善雖小而弗遺力或矜其不逮
誓竭講廟之效庶酬假勗之仁

代都運趙待制謝上表

強至

小材而臨大計不知經畫之所從薄量以函厚恩唯有
思勤而可補竊以今之北道重曰外臺邊宿勁兵境控
彊虜歲支洪河之備而民力幾屈所以艱於賦輸地列
數鎮之師而吏員益繁所以要在刺舉宜擇精明彊濟
之器以付轉給澄清之權若臣空孱於事迂拙歸引兩
川之漕近貳大農之司率猶竭於愚衷訖罕通於利術
敢期煩使乃委孤臣此蓋伏遇皇帝陛下廓天地之容
收涓埃之細特加不次之命而欲勸來者弗責已試效

而俾懷後圖得不夙夜以思始終乃職豈敢顓聚斂之
最以上累於君仁亦當拊凋殘之餘庶下蘇於民瘼

代謝再任表


強至

悃悃繫陳從欲許還於新節衰疲自力竭能勉撫於舊
封委寄逾隆顛隲自懼伏念臣本緣一介之曲學力被
三朝之誤知自解宰鈞繼紆守紱早年遇事風霜不計
於殘軀晚歲纏痾藥餌乃同於常膳比引揣躬之分數
裁辭劇之章力丐閒州少安病質而恩生望外事與願

違俄更西雍之師旄仍付北門之留鑰所以極陳去就
仰黷聰明幸寵利非事君之宜必冀寢加恩之命策疲
駑雖老臣可彊敢不拜再任之休訖奉俞音兩諧愚懇
此益伏遇皇帝陛下至仁天冒盛德海函器使庶工愛
徧舊物雖俊傑甚衆並試有為之時而疋痒之餘惜投
無用之地敢不勤宣條教兼附兵民儻溝壑之未填尚
乾坤之可報



宋文鑑卷六十七



總校官庶吉士臣張能照

校對官助教臣汪錫魁

謄錄監生臣梁如林

欽定四庫全書薈要

集部

宋文鑑卷

六十八至
七十

詳校官候選知縣臣吳嗣華

欽定四庫全書薈要卷一萬九千九百九十一

集部

宋文鑑卷六十八

宋 呂祖謙 編

表

淮南轉運使謝上表

蘇頌

贊畫甘泉久玷三臺之末觀風淮甸驟陞數使之榮朝

寄匪輕地望兼重愧非才選靡稱厥官姑謹詔期趣行
所部寵靈所被畏惕非常竊以州郡備官所以分釐於
民務朝廷遣使所以布宣於主恩付一道之事權用六

條而舉察賦輿出內俾以均輸吏治否臧責之薦黜自
匪縣更於事任詎能振肅於治綱若臣者才不足以適
時慮不足以經遠偶緣資級之例得從選用之階始自
書坊出分使竹帛從褰服入佐計籌粗收歲月之勞蔑
著分毫之效豈謂伏遇皇帝陛下察庶工之任使矜久
職之良勤拔於省僚授以利柄矧惟淮海之部寔搯東
南之衝昔號輿區今逢樂歲五稼盈疇而遂茂四人勤
力以厚生料乎漕運之程無煩趣辦之急惟當敷宣惠

澤通究物情編齊之利病可更立求其本刑政之重輕
或失當適其中止期靖嘉少稱論擇若乃事體貌以為
風采盡銖兩以歛民財顧在懦愚誠多濶略重念上慈
天覆聖治日新官無內外之殊事悉憂勤之繫昨臣受
任之始獲面於清光陛下臨遣之言曲加於勉諭自省
最為於踈遠何圖亦記於淵衷豈非以委任之優故特
示拊循之厚雖乾坤平施非報謝之可言而犬馬微生
第勤勞而思奮儻驅馳之有用期終始以無踰

右僕射待罪表

蘇頌

聖恩深厚仰戴曷勝孤迹兢危彷徨靡所切以宰輔大任表率百官人望所歸則論議行而必信物情不與則名器輕而易搖而臣猥以朴愚誤蒙任使上不能謨明國體以熙庶工下不能甄別人材以協衆望誤朝有遣擢髮寧窮致招人言上黷天聽名一註於白簡罪當寘於丹書雖二聖覆之如天未令投迹於四裔而羣言謂其失職豈宜包羞於近班是以屢貢封章冒塵疏纈再

紆中札曲諭宸衷捧詔驚惶重自思省本欲便祈於歸
老屬茲方負於罪辜儻布懇誠懼為僭越在臣進退之
分敢計重輕於國廢置之間實關勸沮伏望太皇太后
陛下皇帝陛下矜憐其戇本無它腸案舉嚴科亟行幽
黜一則安全於介拙尚保餘生一則厭息於煩言遂清
朝路

衡州鹽倉謝上表

劉摯

議令獻言知典刑之無赦原心觀過荷仁聖之有容貸

其餘生處以善地伏念臣稟生艱拙遭世盛明學不能窮理而知幾材不足趣時而適變晞名涂以旅進濫文館之末游和鉛何功索米逾歲間承人乏偶攝掾於中堂旋誤聖知使備員於憲府仍職書林之舊就行御史之中始自愚臣前無故事方陛下繼承於五聖而國朝平治者百年力勤肯穫之田大解不調之瑟蒐拔羣材而審以器使變化百度而曠然日新臣於此時職在言路誓殫忠義敢避勢權寧以孤睽計切涕衆而危身不

忍從容唱和負恩而速進狂愚自信裨益無方故宿官之日幾何而瞽言之罪非一至如均民而弛役因之率戶而出泉雖慮始樂成者愚人之不知然損下益上者先王之大戒輒條十害冀補萬分議臣見譏以為敗謀而亂化清衷獨見知其有責而盡言不徇以誅止容其去褫臺閣之二職置瀟湘之一涯有祿食使之存全有職事可以報效銜恩載幸揣分增憂此蓋伏遇皇帝陛下察臣孤忠全國大體不惜骫一夫之法庶幾留衆正

之門謹當上體恩仁期於必報下堅節義死而不渝

謝青州到任表

劉摯

東方大國莫如鄆青愚臣何人繼命帥守莅官茲始揣
已不遑伏念臣器縕至疏智靈弗競遭會繼明之始越
膺共政之圖三府空逮於六期千慮蔑聞於一得雖進
退必繇其道常願學乎聖人而功烈如此其卑終難収
於士論寬典刑於司敗假丘壠之便藩報政稽期實愧
三年之魯改符易地猶叨四履之齊惟時東秦號一都

會士知禮義境控海山厥民富饒少敘攘之舊習其俗
舒緩有平易之餘風謹於承流可以無事曾是迂愚之
品獲塵寄委之優此蓋伏遇皇帝陛下乾健而粹純豐
中而光大沉幾以通變化定鑑以御妍媸人無遐遺材
以器使臣敢不振厲衰境激昂至恩簡禮去煩稍究前
修之治推仁宣澤庶求遠俗之安儻集涓微仰酬覆燾
知亳州謝上表

劉攽

齒髮衰暮藩鎮會繁據非所安榮以為懼昔者聖門高

弟方六七十則所願為漢世諸儒至二千石謂之達宦
蓋量力審己雖小邦寔曰才難逢辰慕君在有道不容
微幸此所以前哲言志區區其若彼後賢受祿振振焉
在茲況如愚臣本緣末學粵塵仕路不棄昌時暨忝分
符遂更三郡曹為近輔非復自檜之譏魯并泰山仍有
變齊之舊至於渦譙名壤淮楚近郊猶龍之所誕生真
聖是焉臨幸大朝景亳兼武湯之上儀迎年執期格帝
鴻之純貺民俗既富官守維嚴豈伊戇愚猥叨寄任邈

逾淮分高視曩先密焉自思仍有餘寵獸擊換舊僅踰
朞月之淹隼旆越疆纔倍宿春之費此葢伏遇皇帝陛
下聖神妙算睿智極深廓久照於容光溥太和於播物
流形品彙默化陶鈞致是小材預膺榮遇謹當布宣詔
旨盡瘁官箴為身愚謀雖冀不殆於知止報國本願尚
謝餘生於自然誓殞百身勿渝一志

知襄州謝上表

劉攽

脫身謫籍縲組近藩仰荷恩華不任感懼臣早者濫承

人之出假使車材非所長力不自料黽勉歲月孤負選
掄正所謂斗筭之才何暇論繩墨之外然惟利術至廣
巧者有餘果聞係踵之後人略取析豪之上第涇以渭
濁故常畏於後生李代桃僵竊自悲於薄命遽辱黜幽
之典實由既往之愆浮舟江湖託身瘴癘無復自新之
望長懷永棄之憂不謂明詔發中湛恩逮下俾復乘軒
之寵仍加分虎之榮情同更生感惟出涕此蓋伏遇皇
帝陛下離明廣照乾度并容紹庭之初方勤心於陟降

思皇之際亦代匱於細微以是孱愚得從甄敘謹當勉
求民瘼恪佩官箴犬馬之心以勞力故能有養桑榆之
景雖已老尚冀無渝

徐州謝上表

蘇軾

分符高密已竊名邦改命東徐復塵督府荷恩深厚撫
已兢慙伏念臣奮身農畝託迹書林信道直前曾無坎
井之避立朝寡助誰為先後之容向者屢獻瞽言仰塵
聖鑒豈有意於為異蓋篤信其所聞顧慙迂濶之言雖

多而無益惟有朴忠之素既久而猶堅遠不忘君未忍
改其常度言之無罪實深恃於至仁知臣者謂臣愛君
不知臣者謂臣多事空懷此意誰復見明伏惟皇帝陛
下日月照臨乾坤覆燾察孤危之易毀諒拙直之無他
安全陋軀畀付善地民淳訟簡殊無施設之方食足身
閒仰愧生成之賜顧力報之無所懷孤忠而自憐

徐州賀河平表

蘇軾

聖謨獨運天眷莫違庶邦子來民罔告病萬杵雷動役

不逾時遂消東北莫大之憂然後麥禾可得而食人無
後患喜若再生伏以大河為災歷世所病禹治兗州之
野十有三載乃同漢築宣房之宮二十餘年而定未有
收狂瀾於既潰復故道於將堙俛仰而成神速若此恭
惟皇帝陛下至仁博施神智無方達四聰以來衆言廣
大孝以安宗廟水當潤下河不溢流屬歲久之無虞故
患生於所忽方其決也本吏失其防而非天意及其復
也蓋天助有德而非人功振古所無溥天同慶維豐沛

之大澤實汴泗之所鍾伊昔橫流凜孤城之若塊迨茲
平定蔚秋稼以如雲害既廣則利多憂獨深而喜倍雖
官守有限不獲趨外庭以稱觴而民意所同亦能抒下
情而作頌

謝失覺察妖賊放罪表

蘇軾

盜發所臨守臣固當重責罪疑則赦聖主所以廣恩自
驚廢逐之餘猶在愍憐之數伏念臣早蒙殊遇擢領大
邦上不能以道化民達忠孝於所部下不能以刑齊物

消姦宄於未萌致使妄庸敢圖僭逆原其不職夫豈勝
誅况茲溝瀆之中重遇雷霆之譴無官可削撫已知危
至於捕斬羣盜之功乃是鄰近一夫之力謹言其始偶
出於臣雖為國督姦常懷此志而因人成事豈足言勞
勉自列於涓埃庶少寬於斧鉞豈謂蕩然之澤許以勿
推收驚魄於散亡假餘生之晷刻退思所自為幸何多
此蓋伏遇皇帝陛下舞虞舜之干示人不殺祝成湯之
網與物求生其間用刑本不得已稍有可赦無不從寬

務在考實而原情何嘗記過而忘善益悟向時之所坐
皆是微臣之自貽感愧終身論報無地布衣蔬食或未
死於饑寒石心木腸誓不忘於忠義

謝宣召入院狀

蘇軾

詔語春溫再命而僂使華天降一節以趨在故事以嘗
聞豈平生之敢望省循非稱愧汗交深竊以視草之官
自唐為盛雖職親事秘號為北門學士之榮而祿薄地
寒至有京兆掾曹之請豈如聖代一振儒風非徒好爵

之縻兼享太烹之養玉堂賜篆仰淳化之彌文寶帶重
金佩元豐之新渥既厚其禮愈難其人而臣以空踈冗
散之材衰病流離之後生還萬里坐閱三遷不緣左右
之容躡處賢豪之上此蓋伏遇皇帝陛下生資文武天
祚聖神雖亮陰不言尚隱高宗之德而訪落求助已啓
成王之心首擇輔臣次求法從知人材之難得采虛名
而用臣敢不益勵初心力圖後効才不逮古雖慙內相
之名志常在民庶免私人之誚

謝侍讀表

蘇軾

北門視草已叨儒者之極榮西學上賢復玷侍臣之高
選省循非稱愧汗交懷竊惟講讀之臣止以言語為職
考功課吏無殿最之可書陳善閉邪有膏澤之潛潤豈
臣愚陋亦所克堪此蓋伏遇太皇太后陛下憂思深長
德業久大受先帝投艱之託為神孫經遠之謀故選左
右前後之人罔非吉士使知興亡治亂之效莫若多聞
謂臣雖無大過人之才知臣粗有不欺君之實故使朝

夕與之討論奉永日之清閒未知所報畢微生於盡瘁
終致此心

杭州謝放罪表

蘇軾

臣近以法外刺配本州百姓顏章顏益二人上章待罪
奉聖旨特放罪者職在承宣當遵三尺之約束事關利
害輒從一切之便宜曲荷天慈不從吏議伏念臣早緣
剛拙屢致憂虞用之朝廷則逆耳之奏形于言施之郡
縣則疾惡之心見于政雖知難每以為戒而臨事不能

自回苟非日月之明肝膽必照則臣豈惟獲罪於今日
久已見傾於衆言恭惟皇帝陛下濬哲生知清明旁達
委任羣下退託於不能愛養成材惟恐其有過知臣欲
去一方之積弊須除二猾以示民特屈憲章以全器使
臣敢不省循過咎祇服簡書眷此善良自不犯於漢法
時有貸捨用益廣於堯仁

又謝太皇太后表

蘇軾

亂羣之誅不請而決蓋恩威之無素致姦猾之敢行方

俟譴呵豈期寬宥伏以法吏網密蓋出於近年守臣權
輕無甚於今日觀祖宗信任之意以州郡責成於人豈
有不擇師帥之良但知繩墨之馭若平居僅能守法則
緩急何以使民顧臣不才難以議此恭惟太皇太后陛
下寬仁從衆信順得天推一身之至公納萬方於無罪
而臣始終被遇中外蒙恩謂事有專而合宜情無他而
可恕故加貸捨以示寵綏朝廷之明粗以臣為可信吏
民自服當不令而率從

賀駕幸太學表

蘇軾

輦回原廟既崇廣孝之風幄次儒宮復示右文之化禮
行一日風動四方臣聞五學之臨三代所共蓋天子不
敢自聖而盛德必有達尊在漢永平始舉是禮雖臨雍
拜老有先王之規而正坐自講非人主之事豈如允哲
退託不能奠爵伏興意默通於先聖橫經問難言各盡
於諸儒恭惟皇帝陛下文武憲邦聰明齊聖大度同符
於藝祖至仁追配於昭陵故舉舊章以興盛節臣早塵

法從久侍經幃永矣馳誠想聞合語於東序斐然作頌
行觀獻馘於西戎

謝賜歷日表

蘇軾

歲頒正朔蓋春秋統始之經郡賜璽書亦漢家寬大之
詔實為令典豈是空文伏以望歲者生民之至情畏天
者人君之大戒所以常言報應而不言時數每奏水旱
而不奏嘉祥上有消復之心下有變調之道固資共理
同底純熙恭惟皇帝陛下祇敬三靈憂勤萬宇為仁百

世自然天下之歸教民七年豈無善人之效臣敢不仰
遵堯典寅奉夏時謹隄防溝洫之修行勞來安定之政
庶殫綿力少助至仁

賀立皇后表

蘇軾

纘女維莘倪天之妹事闕廟社喜溢人神臣聞三代之
興皆有內助二南之化實本人倫維闕睢正始之風具
既醉太平之福民有所恃邦其永昌恭惟皇帝陛下自
誠而明惟睿作聖輯寧夷夏德既茂於治朝輔順陰陽

政兼修於內職既膺大慶益廣至仁下逮海隅夫婦無
有愁嘆上符天造日月為之光明受祿無疆與民同樂
謝禮部尚書表

蘇軾

備員西學已愧空疎易職東班尤驚忝冒遂領宗卿之
任并為儒者之榮始臣之學也以適用為本而恥空言
故其仕也以及民為心而慙尸祿乃者屢請治郡兼乞
守邊欲及殘年少施實効而有志莫遂愧負何言今乃
以文字為官常語言為職業下無所見其能否上無所

考其幽明循省初心有覲面目故於拜恩之日少陳有
益之言孔子曰一言可以興邦而孟子亦曰一正君而
國定昔漢文悅張釋之長者之言則以德化民輔成刑
措之功而孝景入晁錯數術之語則以智馭物馴致七
國之禍乃知為國安危之本只在聽言得失之間恭惟
陛下即位以來學如不及問道八年寒暑不解講讀之
官談王而不及霸言義而不及利八年之間指陳至理
何啻千萬雖所論不同然其要不出六事一曰慈二曰

儉三曰勤四曰慎五曰誠六曰明慈者謂好生惡殺不
憲兵刑儉者謂約已省費不傷民財勤者謂躬親庶政
不近女色慎者謂畏天法祖不輕人言誠者謂推心待
下不用智數明者謂專信君子不雜小人此六者皆先
王之陳迹老生之常談言無新奇人所易忽譬之飲膳
則為穀米羊豕雖非異味而有益於人譬之藥石則為
耆朮參苓雖無近效而有益於命若陛下信受此言如
御飲膳如服藥石則天人自應福祿難量而臣等所學

先王之道亦不為無補於世若陛下聽而不受受而不
信信而不行如聞春禽之聲秋蟲之鳴過耳而已則臣
等雖以三尺之喙日誦五車之書反不如醫卜執技之
流簿書奔走之吏其為尸素死有餘誅伏願陛下下一覽
臣言少留聖意天下幸甚

謝賜對衣金帶馬表

蘇軾

服章在笥貴及衰殘銜勒過庭喜先徒御伏以物生有
待天施無窮草木何知冒慶雲之渥采魚鰕至陋借滄

海之榮光雖若可觀終非其有妻孥相顧驚屢致於匪
頒道路竊窺或反增於指目此蓋伏遇太皇太后陛下
聰明齊聖陳錫載周含垢匿瑕而察於求賢卑宮菲食
而侈於養士士豈輕於千里念非其人言有重於兼金
當思所報

謝復官提舉玉局觀表

蘇軾

七年遠謫不意自全萬里生還適有天幸驟從縲紲復
齒縉紳伏念臣才不逮人性多忤物剛褊自用可謂小

忠猖狂妄行乃蹈大難皆臣自取不敢怨尤會真人之
勃興與萬物而更始而臣獨在幽遠最為冥頑迨茲起
廢之初倍費生成之力終蒙記錄不遂棄捐此蓋伏遇
皇帝陛下正位龍飛對時虎變神武不殺孰非受命之
符清淨無為坐獲銷兵之福聰明不作邪正自分使臣
得同草木之微共霑雷雨之澤臣敢不益堅素守深念
往愆沒齒何求不厭飯蔬之陋蓋棺未已猶懷結草之

忠

建寧軍節度使謝表

呂惠卿

備嚴近之選而抵非常之愆當清明之朝而罹甚重之譴孽乃自作咎將誰歸伏念臣起自諸生暗於大道持竅啟之聞而欲經於事變信呻吟之得而希掛於功名分既過逾理宜顛越矧先帝有為之始乃羣材願効之時輒先要津以閤賢路雖預討論者三四事而參幾務者一二年凡是蠹國害民之由實臣懵學誤朝之致豈亦下流之所處更令衆惡以皆歸偶失當時士師之刑

難逃今日司直之論尚蒙善貸未寘嚴誅特從四裔之
遷以正三凶之比衰疲遠謫人皆知其難堪親愛生離
聞者為之太息伏惟皇帝陛下天仁自得聖孝光充撫
弓劍之遺藏每加悽愴顧廟堂之舊物寧不盡傷特罪
悔之至深猶典刑之為屈龍鱗鳳翼已絕望於攀援蟲
臂鼠肝一冥心於造化涕逐言出莫知所從

賀元日大朝會表

呂惠卿

寶典更端明廷四覲上儀畢舉綿寓均懽恭惟皇帝陛

下道大同於堯天日躋格乎湯聖深仁普博達孝光通
神祇感於治馨祥嘏由乎和致維歲日月時之首乃朝
宗覲遇之先循用舊章適陳盛禮東臺瑞物冠玉璽之
珍符左戶輿圖增金城之列障樂象成而乃作文稱賀
以非虛多士盈庭四夷在列忻逢千載之運敬上萬年
之觴臣俯迫頽齡久縻外閫不及趨慶闕庭徒切瞻依
旒冕

謝翰林侍講學士表

范祖禹

辭其可辭敢忘故事受其可受祇服新恩洪惟真宗初
置講職問學常勤於日昃論經或至於夜分以啓迪於
後人俾監觀于成憲先帝更新治職止命兼官雖因革
之制不同而經緯之文則一惟熙寧元豐之成烈有金
匱石室之舊聞丕顯帝謨尚資史筆追觀列聖之典多
委四輔之臣夫何一介之微膺此二任之重此蓋伏遇
皇帝陛下欽明文思齊聖廣淵如日方中法天不息謂
二帝三王之道當窮極於高深一祖四宗之書已光昭

於永久惟念終於典學聿追孝於前文以臣夙侍書筵
叨塵史觀曲加寵數用示眷留昔魯穆公之於子思亟
饋鼎肉燕昭王之於郭隗改築金臺二子者或以無人
乎側而不能安或欲致士於遠而先為始如臣陋學敢
望古人非懷人爵之可榮竊喜聖心之不倦

宋文鑑卷六十八

欽定四庫全書薈要卷一萬九千九百九十二

集部

宋文鑑卷六十九

宋 呂祖謙 編

表

開封府羣見致辭

林 希

臣希等伏以聖人在上首善始於京師天下修文貢士
興於畎畝此乃伏遇尊號皇帝陛下仰稽古道下育人
材發明詔於多方命興賢於列郡臣等繆當詔旨輒與
能書雖為草野之臣得奉天庭之貢

尚書禮部元會奏天下祥瑞表

林希

臣珪等言尚書禮部得元豐五年天下所上祥瑞宣徽南院使判北京臣拱辰承議郎提舉河北常平等事臣宜之通議大夫知秦州臣公孺龍圖閣待制知青州臣綰正義大夫知安州臣甫朝議大夫知興元府臣景華朝奉大夫知榮州臣震西上閣門使知雄州臣舜卿禮賓使知安肅軍臣孝綽文思使知憲州臣詵朝散郎知鼎州臣伋知歙州臣堯封朝奉郎知蜀州臣少連承議

郎知安德軍臣從諒知利州臣山等言所部有芝生於
州宅寺觀殿閣柱有七莖者一苗長尺餘者六牛生二
犢者二嘉禾合穗者三五本合為一者一麥一莖三穗
者四四穗者五穗者百餘穗者各一白烏白鵲生於巢
者各一臣聞聖人出而四海清帝命昭而萬靈集必致
諸福之物以表太平之符伏惟皇帝陛下體堯之仁躬
舜之孝力行勤儉而本以化物誠意惻怛而出於愛民
是以指麾之間功業成就覆載之內陰陽協和蒙被羣

生浹肌膚而淪骨髓涵濡異類霑動植而洽飛翔仰而
觀者景星慶雲俯而視者醴泉甘露扶踈煒燁發為朱
草三秀之英游泳服馴則有白麟一角之異嘉葩連理
之木異畝同穎之禾巢鵲可附而窺池龍可拳而擾謂
宜作為聲詩而奏於郊廟深詔太史而著之簡編以永
無疆之休以昭特起之蹟考諸已往固可謂絕世之殊
祥抑而弗宣猶以為盛德之餘事自時所紀殆不絕書
今者駕鸞輅以充明庭撞黃鍾而御太極典禮大備官

儀一新殊方駿奔重譯輻輳自昔辯髮卉裳羈縻之所
未至踰沙軼漠言語之所未通咸奉玉帛而介九賓襲
衣冠而獻萬壽烜赫威德冠古超今魏魏煌煌傳示仁
極鋪張王會之衆美裒對皇家之盛容臣等恭率有司
伏尋故事稽參圖牒宜先象齒之珍敷道句臚敢上龍
墀之奏歡呼抃蹈倍萬常情

尚書省謝車駕臨幸表

林希

天臺肇建具崇喉舌之司帝車下臨增重陞廉之寄非

常之舉視古無倫恭惟皇帝陛下天縱多能日新盛德
剷除衆弊裁制萬微考先王之董治官立尚書以政為
本紀綱條理見微旨於新書初作規模別牧司於著位
蓋慮之積年而成於茲日聞諸前世而驗於方今忽紆
清蹕之傳采聳鴻都之觀且北辰居極外環象斗之宮
而黃道所經旁及積星之位瞻威顏於咫尺被法語之
丁寧敕以在公退而交儆分曹帥屬燦然周典之文望
輦拜恩陋彼漢郎之嘆矧復宗藩旅進禁從相趨凡獲

侍於宸遊皆預窺於聖作歡聲載溢慶榮遇於一時信
史備書流美談於萬世臣等叨膺重任久負明恩顧懷
備位之慙第劇逢辰之幸敢忘策勵期稱寵臨

亳州謝賜卹刑詔書表

林希

奉聖詔之丁寧見上心之欽恤恭惟皇帝陛下治道清
淨本堯舜之性仁訓辭哀矜同禹湯之罪已雖推行故
事實憂閔黎元臣所領州地號重法南為故楚北則全
齊椎埋為姦其來尚矣殺越于貨間或有之嚴設檢防

深用懲艾臣初至問俗云比年稍登咸知愛身頗重犯
法夫廉恥以衣食為本豐凶者獄市之原民之常情勢
自當爾臣謹遵奉成憲申戒有司囹圄之間敢遂期於
無犯縲繫之下庶罔底于非辜祇循寬條用塞吏責

謝天章閣待制表

林希

忽繇疎遠俾冒恩榮進不得辭退何勝懼臣竊惟朝廷
名位本以待殊尤特起之才臺閣縉紳宜序進於侍從
論思之列分義既定品流自安敢意超踰條及孤外伏

念臣少而嗜學仕則為貧擊柝抱關初安一命磨鉛削
槩忝事三朝金馬石渠出入殆逾於二紀皇墳帝典討
論嘗預於片言一去軒墀五更符印方兩宮之旰食閔
赤子之阻饑申敕守臣悉發常平之廩蠲裁歲計就輟
上供之儲全活者一方更生者萬口父老至於感涕童
稚莫不驩呼脫於溝壑之虞皆自乾坤之施顧臣無職
在法何逃覈實之誅屏息以俟伏遇皇帝陛下智周萬
物明燭四方通達下情靡遠邇戚疏之有間主張善類

故包函庇覆以無遺既保宥以曲全復矜憐其久次拜
恩舊服玷籍近班譽生不虞寵出非望無循吏之政誤
被璽書之褒有稽古之愚曷稱服章之錫況臣心甘寂
寞年迫衰遲分以滯蒙老於冗散今茲收擢彌甚驚憂
惟是偏州適承明詔漕由京口控全吳飛輓之衝埭復
古城救積歲旱乾之患方且身先畚築手諭準繩計蚤
莫以收功成江淮之長利儻容戮力豈憚糜軀天日九
重但心存於北闕圖書三閣許夢到於西清

謝賜資治通鑑表

張舜民

臨政願治乃明主之用心受詔修書皆儒臣之能事成而進御寵以匪頒何彼下臣遽霑優賜恭惟英宗皇帝生知典學性好觀書豈止求之多聞實欲輔之自得然萬機叢委載籍紛繁自學者不得遍窺況人主何暇周覽思有所述頗難其人疇若人哉莫如光者給尚方之筆札萃三館之圖書許自辟官用資檢討量加常俸不責課程上下馳騁於數千載之間出入將隨於十九年

之內其間明君良臣箴規議論切磨之精語名將循吏
方略條教魁梧之偉功休咎庶證之原天人相與之際
抉擿姦宄褒崇善良網羅羣言囊括舊史如海之藏珍
怪魚龍之無數如山之包草木鳥獸之難名披分畎澮
之末流蔽映彫蟲之小技旅遊東國常屢歎於斯文留
滯終南遂克終於先業雖古者興亡事迹固已燦然而
光之筋力精神於此盡矣尚苦言官之督責熟諳俚俗
之謗嗤卒成一代之書仰副兩朝之志揭為通鑑時則

弗迷資彼治原捨茲安出神宗皇帝引講筵而進讀揮
宸翰以賜名製序而冠其篇端鏤板而布之天下仰君
臣之際會已極丹青何父子之淪亡忽悲風露豈謂門
牆之舊物退收鉛槧之微功開卷涕流拜嘉汗浹此乃
伏遇皇帝陛下聰明廸祖宵旰思皇留神於乙夜之勤
訪問於西清之奧伏遇太皇太后陛下敕寧大業持載
烝民安所寶之儉慈格無疆之壽考遠追三鑑坐振四
維顧一介之靡遺與羣賢而樂共儲無儋石曾非菽水

之憂家有賜書留作子孫之寶

謝諫議大夫表

張舜民

方安謫籍忽對鋒車入瞻八彩之秀毫進與七人之上
列竊聞明主臨政而願治先王為官而擇人號曰梓材
取其器使若夫諫爭之任政惟侍從之臣地密而選清
秩卑而望重其所以起居言動則與史官相表裏其所
以彈訶風察則與臺憲同戚休始則專弼人主之違今
乃汎論天下之事乃者藥石不進鳬鴈僅存仗馬一鳴

茅茹不已豈謂大明之東出廓然覲雪之日消鼓之以
惠風潤之以膏澤南窮海嶠北浹江湘脫禁錮者何翅
二千人計水陸則不止一萬里死者傷嗟之不及生者
扶匐以來歸昔居輔弼之崇謀謨帝所終作蠻夷之鬼
棄擲道傍古先未之或聞畢竟不知其罪敢望桑榆之
晚景獲依日月之末光招魂於楚水之涯拭目於雲臺
之表手遮西日口誦離騷齒髮摧頽謾索太倉之粟衣
裳顛倒驚聞長樂之鐘此乃伏遇皇帝陛下上當天心

下厭人望見機不俟終日從諫甚於轉圜變通得之神
宗寬大類乎仁祖豈止芻蕘之被賞將令泉壤以銜恩
率是以行為國何有敢不激昂暮氣緝理空文乘白馬
而伏青蒲試圖來效餓西山而蹈東海期免後艱

謝賜恤刑詔表

李清臣

徒孥頌繫交手傳懽聒隸聞音相趨動色雷風鼓舞律
呂和平屬在守臣惟知虔命切惟歷代之為政莫若本
朝之恤刑承平幾百四十年覆養方二三萬里德如天

地日月恩及草木蟲魚尚慮府縣狴牢官曹卒吏誦司
空城旦為業習柱後惠文之風喜作煩苛私行慘刻或
致孤窮亡告疾痛不聊是頒詔教之丁寧申喻州邦之
長守使之網羅寬大櫺檻疏通日與涼飈時視藥物比
周王之扇暘殆又過之雖夏后之泣辜亦止如是此蓋
恭遇太皇太后陛下睿慈燕裕仁治醇醲尊居九重之
深周念四海之遠謂聖世不專以刑為天下王者常欲
以恩結民心仰寧八室之光靈垂慶億年之統祚臣敢

不奉行上意祇率外臣

免加右光祿大夫表

李清臣

宗廟穆清方祔神靈之享王庭昭曠重推雨露之恩優渥荐臻震皇無措敢殫血懇仰冒聖聰竊以義者天下之大經分乃人臣之常守稱多量少豈宜有失於一毛論重評輕必使外厭於羣議如龠合之器是何足以容黼庀如杙櫨之材彼安能以勝梁棟苟犯滿溢之戒將貽顛覆之憂伏念臣技能素卑問學殊淺無益當時之

實用宜為盛世之時人歷任累朝誤躋四輔日索太倉
之米月受水衡之錢職空任於股肱勤不施於竹帛同
省僚列豈無邪廠而詆訶舊山隱淪能不指背而譏笑
夙宵慙赧形影徬徨未退即於幽閑已深慙於尸素更
增顯寵將累至公恭遇皇帝陛下天縱睿明日新制作
欲贊斯時之美方收多士之英致此誤恩猥加朽質任
人惟舊固唯聖主之隆私受爵斯亡深懼先民之至誠
冀還異數庶息煩言

謝除中書舍人表

蘇轍

越從左史擢領西垣口出命書身參法從念山林之迹
本無富貴之心聞命若驚固辭不獲伏念臣生本西蜀
家世寒儒學以父兄為師貧無公卿之助私有求於祿
養輒自力於文詞慨然東遊無以上達際會仁祖訪求
直言策語猖狂恃聖神之不諱考官怪怒惡悻直之非
宜孰知悟俗之言特被愛君之詔感激恩遇遂忘死生
莫酬國士之知適有私門之禍未填溝壑重迫饑寒時

於道塗望見神考一封朝奏夕聞召對之音衆口交攻
終致南遷之患生雖不遇嘗辱顧於二宗時不見容勢
殆瀕於九死厄窮自致黽俛何言敢云衰病之餘復被
寵光之幸此蓋伏遇太皇太后陛下母慈均覆坤德無
私欲以任姒之明躬行堯舜之道肆求多士以遺成王
耆老畢會於朝廷耕築不遺於林莽遂令拔擢猥及空
疎馮唐已衰猶願雲中之往貢禹雖老未忘封事之勤
譬如木之在山生則荷恩而死無所怨水之於地行則

潤下而止不敢辭臣之事君義亦如此欲報之意非言所殫

謝除尚書右丞表

蘇轍

渙汗之恩已行而不反偃僂之志雖勤而莫伸上愧鴻私下慙公議恭惟皇帝陛下接堯舜之統蹈成康之仁體貌先正耆老之臣揀拔後來翹秀之士俛仰六載前後幾人坦然公明故不私賢否之實穆然淵默故坐照情偽之真臨御久則鑒愈明得失分則下無隱如臣者

西南賤士章句小儒早歲猖狂偶竊方聞之選中年流
落既安縣尹之卑遭時乏人致位近侍跌宕文墨之圃
囁嚅議論之場舉皆空言安有實效顧惟省轄之重實
參國論之餘豈無遺賢遽及微品地寒資淺何以望三
事之餘光才短力罷安能裁六聯之滯論雖復黽俛就
職愧歎何言此蓋伏遇皇帝陛下天地之仁曲成草木
之陋父母之愛不錄子弟之非將建大厦以覆羣工故
收衆材而無棄物然臣負過其力受非所容惟有潔已

無私或不孤於託付引類自助幸得免於顛隲不渝始終少答恩造

賀明堂表

蘇轍

饗帝尊親古今之大典推恩肆青天地之至仁舉此盛儀併在今日伏惟皇帝陛下以仁御世以誠事天乾清地寧兵戢民阜人悅故神罔不宥物備故禮得以成一享園丘三謁路寢誠敬之心與日兼茂寬大之澤靡物不蒙能事既修全福自至方將享堯舜之上壽膺成康

之令名民願所同天心是若臣頃侍帷幄稍歷歲時譴責之深坐甘沒齒江湖之遠猶冀首丘久蟄泥塗聞震雷而惕若深囚籠檻得清風而自疑

降朝請大夫謝表

蘇轍

罪大恩寬言者未厭官高德薄法所不容尚領真祠實出寬憲伏念臣早塵近列無補明時下則拙於身謀上則闇於國體先朝矜其愚陋宥以遐荒前後七年浮沉萬死偶真人之御歷數大號以惟新普復舊官亟叨厚

祿然臣年迫衰暮知復何為身利退藏顧未敢請因循
於此黽俛自慙雖復追削者五官仍且獲安於閑局涵
恩至厚為幸已多此蓋伏遇皇帝陛下以堯舜之仁行
成康之政衷未忘於舊物恩許畢其餘生臣謹當杜門
躬耕沒齒蔬食知生成之難報姑靜默以待終

代賀景靈宮奉安御容禮畢表

呂希純

即上都之福地載廣珍庭會列聖之睟容益嚴昭薦良
辰叶吉縟禮告成凡預照臨率同慶抃竊以仙源濬發

帝業肇基祖功休盛於湯文宗軌繼隆於啓誦雖寢廟
時饗裸將克備於靈承而衣冠月游館御未經於制度
茂惟真主允集大成皇帝陛下孝至格天文明若古眷
神功潛躍之字有章聖誕彌之祥夙建清都仰延真馭
迺規恢於舊址庸考卜於新宮凜然太紫之威隱若神
明之奧惇宗有昭穆之敘謁款無來往之煩而復秘殿
重深列儀坤之正位回廊曼衍圖拱極之近寮逮不日
以休功肆前期而歲事璿題洒落煥東壁之星躔藻衛

森羅備甘泉之法駕奉雕輿而降格祓玉座以安安詔
蹕亟臨羣司徧至瞻舜瞳而增慕施禹拜以忘勤精意
克申繁禧舉集洽需雲而示惠霈解雨以疏恩嘉與羣
倫同茲大慶臣蚤塵樞幄方守塞垣阻陪駕鷺之班徒
深燕雀之賀

宋文鑑卷六十九